

■ COLUMNA

I fiss pli cumadaivel...

DA SILVANA DERUNGS

Turnar en la realitad è stentus. Quai stoss jau adina constatar sunter avoir gi vacanzas. I fiss pli cumadaivel da restar en tschel mund – betg quel dal lavurar-nagut, mabain quel dal savair-nagut.

Cura che jau fatsch vacanzas ordaifer la Svizra na legel jau betg gasettas e na taidlel e guardel era nagnas novitads en radio e televisiun. Betg da princip, ma simplamain perquai che la chaschun na sa dat per il pli betg. Jau na sun betg in new-junkie che chatscha per tut pretsch las actualitads. Sch'ellas na vegnan betg tar mai – jau na poss betg far gronds sforzs da las tschertgar. Quai n'ha da far nagut cun esser memia marscha dad ir al kiosk e comprar ina gasetta, mabain plitost cun ina tscherta marschadegna mentala. S'informar, esser al current, stuair sa far in'idea en chaussa, stuair avoir in'opiniun, la defender u forse anc agir e far



insatge concret. Però co agir e cu e quant bler e vairamain e sche gea, per tgi e tge fan ils auters e pertge uss atgnamain propri e tge porti insumma??? Igl è stentus. Da stuair/duair/vulair s'occupar dad in mund real. Il mund dad oz ed uss, ma betg directamain qua vesaivel davant mes isch-chasa.

Jau observel adina puspè: Jatgnamain pudess jau viver fitg bain senza savair tge che succeda ordaifer mes cosmos persunal fitg limità. Ta turpegia, ignorant! Schegea ... il fatg che jau sai da tschertas ca-

tastrofas e guerras na meglierescha era betg exnum la situaziun dals umans pertutgads. Ma tuttina... Ins vul la finala era savair da tge che la glieud enturn ins discorra, u betg? (Uau! Jau guard dad esser al current pertutgant la miseria dad auters unicamain per pudair prender part da las discussiuns?!?)

Sunter il return da mi-
sas ultimas vacanzas hai jau – apaina en Svizra – perquai cumprà ina gasetta e cumenzà a deducir dal cuntegn quai che sto esser capità durant mia emna d'absenza. Las truppas da Gaddafi han para bandunà Misrata. En Siria hai dà ina mazzacrada. La Svizra tema ina massa asilants. La catastrofa en il Giapun era gia svanida dals frontispizis avant las vacanzas, la dumonda da las ovras atomaras qua en Svizra vegn anc tematisada davantiers. En Svizra n'hai anc adina betg pluvì. Basilea ha gudagnà cunter YB. Per Pro rumantsch hai jau survegnì dapli e-mails che per Pro idioms. Ed uss?